ONA TILI VA ADABIYOT

- 1. Qaysi gapdagi soʻzlar imlosida faqat tovush almashish hodisasi kuzatiladi?
 - A)U endi podshoning topshirigʻini bajarish uchun uni tinmay maqtar, butun ayyorligini ishga solar edi.
 - B)Barmogʻingiz bilan tirnoq yuzasi burchagidagi nuqtani biroz bosib tursangiz, shunda tish ogʻrigʻi darrov toʻxtaydi.
 - C) Hoʻkiz kechqurun qorni ochib, charchab kelsa, uning oldiga bir bogʻ quruq poyani tashlab qoʻyar ekan.
 - D) Garchi bu hol ularni oqlashga tirnoqcha asos boʻlmasa ham, koʻnglimda oʻzimga tasalli berish, aldash kabi bir kayfiyat bor edi.

Ushbu test topshirigʻini bajarish uchun nutqimizda roʻy beradigan tovush oʻzgarish hodisalari haqida bilim va koʻnikmaga ega boʻlish talab etiladi. A javobdagi soʻzlar imlosida faqat tovush almashish hodisasi kuzatiladi, va'ni *topshiriq'ini* va ayyorliqini soʻzlarida egalik qoʻshimchasi qoʻshilishi natijasida q undoshining g' undoshiga hamda k undoshining q undoshiga almashishi yuz bergan. B javobda tovush almashishi va tovush ortishi (barmogʻingiz, tirnoq, burchaqidaqi, shunda, oq'riq'i), C javobda tovush tushishi va tovush almashishi (qorni, quruq), D javobda ham tovush almashishi va tovush tushishi (tirnogcha, koʻnglimda) kuzatiladi. Toʻgʻri javob: A.

Manba: N.M.Mahmudov va boshqalar. 7-sinf ona tili darsligi. "Ma'naviyat" nashriyot uyi. Toshkent-2017.

- 2. Qaysi javobda imloviy xato yozilgan soʻzlar soni ikkita?
 - A)Yaxshilik qilsang, ohirigacha yaxshilik qilgin, zinxor minnat qilma.
 - B) Qor urib turgan bir kun edi. Birdan koʻchada dod-faryot koʻtarilib qoldi.
 - C) Zebi yuragida tugulib yotgan zoʻr tugunni yechib yuborgan edi.
 - D)Oʻrtadagi xontaxtada sovub qolgan kabob va meva-cheva bor edi.

Oʻquvchilarning yozma savodxonligini baholashga qaratilgan ushbu test topshirigʻining A javobida imloviy jihatdan xato yozilgan soʻzlar soni ikkita (ohirigacha soʻzi oxirigacha, zinxor soʻzi zinhor tarzida yozilishi kerak) boʻlib, boshqa javoblarda esa imloviy jihatdan xato yozilgan soʻzlar bir oʻrinda uchraydi. Ya'ni B javobdagi dod-faryot (dod-faryod tarzida yozilishi kerak), C javobdagi tugulib (tugilib tarzida yozilishi kerak), D javobdagi sovub (sovib tarzida yozilishi kerak) soʻzlari imloviy jihatdan xato yozilgan.

Toʻgʻri javob: A.

Manba: N.M.Mahmudov va boshqalar. 5-sinf ona tili darsligi. "Ma'naviyat" nashriyot uyi. Toshkent-2015.

3. Imloviy jihatdan toʻgʻri yozilgan soʻzlar qatorini aniqlang.

A)ajabtovur, armugʻon, tajovuz

- B)daromat, strategiya, sa'y-harakat
- C)pinxona, mudofa, taqiqlamoq
- D)taajjub, zarp etmoq, yondashuv

Oʻquvchilarning yozma savodxonligini baholashga qaratilgan ushbu test topshirigʻida toʻgʻri yozilgan soʻzlar qatori A javobda berilgan. Ya'ni ajabtovur, armugʻon, tajovuz soʻzlarining yozilishida imloviy xatolik uchramaydi. B javobdagi daromat (daromad tarzida yozilishi kerak), C javobdagi pinxona, mudofa (pinhona, mudofaa tarzida yozilishi kerak), D javobdagi zarp etmoq (zarb etmoq tarzida yozilishi kerak) soʻzlari imloviy jihatdan xato yozilgan.

Toʻgʻri javob: A.

Manba: N.M.Mahmudov va boshqalar. 5-sinf ona tili darsligi. "Ma'naviyat" nashriyot uyi. Toshkent-2015.

4. Yigit boshingdan baxt-u davlat yiroq ketmasin.

Ushbu gapda <u>yigit</u> soʻzidan keyin vergul qoʻyilsa, qanday grammatik oʻzgarish kuzatiladi?

A)Gapdagi aniqlovchi undalmaga aylanadi.

- B) Gapdagi ega undalmaga aylanadi.
- C) Gapda uyushiq boʻlaklar hosil boʻladi.
- D)Gapdagi ega kirish soʻzga aylanadi.

Ushbu test topshirigʻi abituriyentning yozma nutqda tinish belgilarining vazifasini bilish, gapdagi ahamiyatini tushunish va nutqda toʻgʻri qoʻllay olish bilan bogʻliq bilim va koʻnikmalarini tekshirishga qaratilgan.

Berilgan gapda yigit soʻzi "yosh, navqiron" ma'nolarida qoʻllangan va aniqlovchi vazifasini bajargan. Agar yigit soʻzidan keyin vergul qoʻyilsa, ushbu soʻz yoshi kichik kishiga (erkak kishiga) murojaat uchun qoʻllanilgan soʻzga — undalmaga aylanadi.

Toʻgʻri javob: A.

Manba: B.Mengliyev va boshqalar. 11-sinf ona tili darsligi. "Oʻqituvchi" NMIU. Toshkent-2020.

5. Qaysi soʻzlar qatorida boshqalari bilan oʻzaro ma'nodoshlik hosil qila olmaydigan soʻz ishtirok etgan?

A)eplamoq, uddalamoq, sarflamoq

- B)yalqov, ishyoqmas, tanbal
- C) betob, bemor, xasta
- D)ayyor, quv, mugʻombir

Ushbu test topshirigʻining B (yalqov, ishyoqmas, tanbal), C (xasta, bemor, kasal), D (ayyor, quv, mugʻombir) javoblaridagi soʻzlarning barchasi bir-biri bilan oʻzaro ma'nodoshlik hosil qila oladi. A javobdagi eplamoq, uddalamoq soʻzlari oʻzaro ma'nodoshlik hosil qila oladi, ammo sarflamoq soʻzi ushbu soʻzlar bilan ma'nodoshlik hosil qila olmavdi.

Toʻgʻri javob: A.

Manba: N.M.Mahmudov va boshqalar. 10-sinf ona tili darsligi. "Oʻzbekiston milliy ensiklopediyasi" davlat ilmiy nashriyoti. Toshkent-2017.

- **6.** Quyidagi gaplarda ajratib koʻrsatilgan <u>band</u> soʻzi haqida berilgan toʻgʻri hukmni toping.
 - 1. Usta pichoqqa <u>band</u> yasash bilan ovora ekan, bezovta qilmadik.
 - 2. Suv kelmasdan band tashlama.
 - 3. Shifokor hozir <u>band</u>, birozdan keyin xabar oling.
 - A)Ushbu gaplarda qatnashgan <u>band</u> soʻzlarining barchasi oʻzaro shakldosh soʻzlar sanaladi.
 - B)1- va 3-gaplardagi <u>band</u> soʻzi oʻzaro koʻp ma'noli soʻzlar sanaladi va ushbu soʻz 2-gapdagi <u>band</u> soʻziga nisbatan shakldoshlik hosil qila oladi.
 - C) Har uchala gapdagi <u>band</u> soʻzi bir soʻzning turli ma'nolarda qoʻllanilishidir.
 - D)2- va 3-gapdagi <u>band</u> soʻzlari oʻzaro koʻp ma'noli soʻzlar sanaladi va ushbu soʻzlar 1-gapdagi <u>band</u> soʻziga nisbatan shakldoshlik hosil qila oladi.

Ushbu test topshirigʻi abituriyentning lugʻat boyligini, ya'ni soʻzlarning ma'nosini bilishi, tilida mavjud soʻzlarning shakl va ma'no munosabatini tushunishi, nutqiy parchada qoʻllanagan soʻzning leksik qurshovdagi holatini tahlil qila olishini tekshirishga qaratilgan.

Test topshirigʻida tahlilga olingan soʻz "band" soʻz(lar)i boʻlib, ushbu soʻz(lar)ning izohi lugʻatlarda quyidagicha keltirilgan:

- 1. Band narsa, qurol-asboblarning qoʻl bilan ushlanadigan qismi;
- 2. Band to 'siq, to 'g'on, g'ov;
- 3. Band biror faoliyat bilan mashgʻul. Ma'lumki, soʻzlar anglatayotgan ma'nolar oʻrtasida ma'noviy bogʻliqlik boʻlmasa yoki yoʻqolgan boʻlsa, bunday soʻzlar shakldosh soʻzlar hisoblanadi. Demak, ushbu soʻzlar oʻzaro shakldosh soʻzlardir.

Toʻgʻri javob: A.

Manba: B.Mengliyev va boshqalar. 10-sinf ona tili darsligi. "Oʻqituvchi" NMIU. Toshkent-2020.

- 7. Qaysi gaplar juftligida berilgan <u>-siz</u> shaxs-son qoʻshimchasi bir oʻrinda birlik va bir oʻrinda koʻplik ma'nosini ifodalab kelgan?
 - A)Siz bu bolaga yetti yot begonasiz, ammo u sizni oʻz otasiday koʻrar ekan.

Endi menga ruxsat berasiz, hali ishlarim koʻp, — dedi auditoriyaga qarab.

- B) Ikkingiz turmush qurasiz, keyin shu yerda yashaysiz.
 - Hali boshqa odamlar bilan ham doʻstlashasiz, aziz bolalar.
- C) Hozir mana bu rasmni chizasiz, oʻgʻlim, keyin ikkovlashib kamchiligini toʻldiramiz. "Siz ham menga juda yoqasiz", — dedi unga.
- D) Kech boʻlib qoldi, qani, turinglar, yigitlar, endi ketasiz.

Hamma yigʻilsin, biz bilan birga joʻnaysiz.

Ushbu test topshirigʻini bajarish uchun shaxs-son qoʻshimchalari va ularning uslubiyati haqidagi bilim va koʻnikmaga ega boʻlish talab etiladi.

Test toshirigʻining A javobidagi birinchi gapda qoʻllangan -siz shaxs-son qoʻshimchasi yakka shaxsni bildirib hurmat ma'nosida qoʻllangan. Ikkinchi gapdagi -siz shaxs-son qoʻshimchasi esa koʻplikdagi shaxslarni bildiradi, ya'ni auditoriyaga (metonimiya asosida soʻz ma'nosi koʻchgan) murojaat qilish orqali bir emas, bir nechta tinglovchi nazarda tutilgan.

C javobdagi har ikki gapda -siz shaxs-son qoʻshimchasi yakka shaxsni bildirib kelgan. B, D javobdagi har ikki gapda -siz shaxs-son qoʻshimchasi koʻplikdagi shaxs-son ma'nosini ifodalagan.

Toʻgʻri javob: A.

Manba: N.M.Mahmudov va boshqalar. 10-sinf ona tili darsligi. "Oʻzbekiston milliy ensiklopediyasi" davlat ilmiy nashriyoti, Toshkent-2017.

N.M.Mahmudov va boshqalar. 6-sinf ona tili darsligi. "Tasvir" nashriyot uyi. Toshkent-2017.

- 8. Qaysi soʻzlar juftligi tub va yasama soʻzlarga mansub boʻla oladi?
 - A)sozlar (musiqa asboblari) sozlar (harakat bildiruvchi soʻz)
 - B)olma(meva) olma (harakat bildiruvchi soʻz)
 - C)kechik (daryoning kechuv joyi) kechik (harakat bildiruvchi soʻz)
 - D)boʻgʻma (kasallik nomi) boʻgʻma (belgi-xususiyat bildiruvchi soʻz)

Ushbu test topshirigʻini bajarishda abituriyentlardan soʻz tarkibi (asos, soʻz yasovchi qoʻshimchalar, shakl yasovchi qoʻshimchalar), tub va yasama soʻzlar haqidagi bilim va koʻnikmalarga ega boʻlish talab etiladi.

A javobda berilgan koʻplik shaklidagi musiqa asbobi ma'nosini anglatuvchi sozlar (soz + lar) soʻzi tub soʻz hisoblanadi, chunki uning tarkibida soʻz yasovchi qoʻshimcha mavjud emas. Ikkinchi *sozlar* soʻzi esa fe'l soʻz turkumiga mansub boʻlib, **soz** sifatiga **-la** fe'l yasovchi va fe'lga xos zamon ma'nosini anglatuvchi -r shakl vasovchi qoʻshimchaning qoʻshilishi kuzatiladi. Bunday xulosaga kelish uchun ushbu soʻzlarning qavs ichida berilgan izohiga asoslanamiz. B javobdagi har ikki soʻz tub soʻz sanaladi: olma(ot) - ol(fe'l) + ma (bo'lishsizlik shakli).C va D javobdagi har ikki soʻz yasama soʻz sanaladi: kech (fe'l) + ik (ot yasovchi) $-\ kech(ravish)\ +\ ik(fe'l\ yasovchi);$ $bo'g'(fe'l) + ma \ (ot \ yasovchi)$ $bo'g'(fe'l) + ma \ (sifat \ yasovchi)$ Toʻgʻri javob: A. Manba: N.M.Mahmudov va boshqalar.

6-sinf ona tili darsligi. "Tasvir" nashriyot

uyi. Toshkent-2017.

9. Qaysi gapda tub va yasama asliy sifatlar ishtirok etgan?

- A)Uning jussasi kichkina boʻlsa ham, yuzlari jiddiy, boqishlari oʻtkir, ovozi esa jarangdor.
- B) Yonbagʻirlarda rang-barang tovlanib, xushboʻy atrini taratayotgan gullarga nazar tashlayman.
- C)Hovlimizda koʻcha eshikdan kiraverishda kichkina, gʻishtin uycha bor.
- D) Temur insoniylik xususiyatlariga ega boʻlgan buyuk shaxs edi.

Ushbu test topshirigʻini bajarish uchun sifat soʻz turkumi va unga xos boʻlgan xususiyatlar haqidagi bilim va koʻnikmaga ega boʻlish talab etiladi.

A javobda qatnashgan kichkina, jiddiy soʻzlari tub asliy sifatlarga mansub boʻlsa, oʻtkir, jarangdor soʻzlari yasama asliy sifatlar sirasiga kiradi. B javobda qatnashgan sifatlar (rang-barang, xushboʻy) yasama sifatlar sanaladi, tub sifat mavjud emas. C javobdagi gapda tub asliy (kichkina) va yasama nisbiy (gʻishtin) sifat qatnashgan. D javobda esa sifat turkumiga oid faqat bitta tub soʻz (buyuk) qatnashgan.

Toʻgʻri javob: A.

Manba: N.M.Mahmudov va boshqalar. 6-sinf ona tili darsligi. "Tasvir" nashriyot uyi. Toshkent-2017.

- 10. Suhbatlashishga arziydigan kishi bilan gaplashmaslik kishini yoʻqotishdir. Suhbatlashishga arzimaydigan kishilar bilan gaplashish soʻzni yoʻqotishdir. Oqil odam esa kishilarni ham, soʻzni ham yoʻqotmaydi. Ushbu parchada qatnashgan fe'llar haqidagi toʻgʻri fikrni aniqlang.
 - A)Ushbu parchada qatnashgan tub fe'llar bir xil bo'lak vazifasini bajargan.
 - B) Ushbu parchada harakat nomi shaklida kelgan tub fe'l qatnashgan.
 - C) Ushbu parchada birgalik nisbatdagi tub fe'l qatnashgan.
 - D) Ushbu parchada qatnashgan tub fe'llar ikki xil nisbat shaklida qo'llangan.

Ushbu test topshirig'ini bajarish uchun fe'l soʻz turkumi haqidagi bilim va koʻnikmalarga tayaniladi. Gapda boʻlishli va boʻlishsiz shakldagi yasama fe'llar (suhbatlashishga, gaplashish, yoʻqotish, gaplashmaslik, yoʻqotmaydilar), boʻlishli va boʻlishsiz shakldagi tub fe'llar (*arziydigan* va arzimaydigan) qatnashgan. Arziydigan va *arzimaydigan* tub fe'llari aniq nisbat shaklidagi fe'llar sanaladi va ushbu fe'llar gapda bir xil boʻlak, ya'ni sifatlovchi aniqlovchi vazifasini bajargan. Mazkur gapda birgalik nisbatdagi va harakat nomi shaklidagi tub fe'llar qatnashmagan. Ushbu ma'lumotlardan kelib chiqqan holda test topshirigʻining A javobida berilgan hukm toʻgʻri ekanligiga ishonch hosil qilish mumkin.

Toʻgʻri javob: A.

Manba: N.M.Mahmudov va boshqalar. 6-sinf ona tili darsligi. "Tasvir" nashriyot uyi, Toshkent-2017.

11. Qutida qizil ruchka <u>bilan</u> yozilgan xat bor ekan.

Mazkur gapdagi *bilan* koʻmakchisi oʻzi bogʻlangan soʻzga qanday ma'no yuklagan?

- A) vosita ma'nosini B) holat ma'nosini
- C) payt ma'nosini D) birgalik ma'nosini

Mazkur gapdagi *bilan* koʻmakchisi soʻzga vosita ma'nosini yuklagan.

Toʻgʻri javob: A.

Manba: N.M.Mahmudov va boshqalar. 7-sinf ona tili darsligi Toshkent "Ma'naviyat"-2017.

12. Bugungi kunda har bir xalq umumbashariy taraqqiyot yutuqlarini oʻrganishga intilmoqda.

Ushbu gap haqidagi notoʻgʻri hukmni aniqlang.

- A) Ushbu gapda fe'lli soʻz birikmasi mavjud.
- B)Ushbu gapda qismlari koʻmakchi yordamida bogʻlangan soʻz birikmasi mavjud.
- C) Ushbu gapda qismlari kelishik yordamida bogʻlangan soʻz birikmasi mavjud.
- D) Ushbu gapda otli soʻz birikmasi mavjud.

Ushbu test topshirigʻini bajarish uchun gapda soʻzlarning bogʻlanishi, kelishikli va koʻmakchili bogʻlanishlar, otli va fe'lli soʻz birikmalari haqidagi bilim va koʻnikmalarga ega boʻlish talab etiladi. Mazkur gapdagi A, C, D javoblarda berilgan ma'lumotlar toʻgʻri ma'lumotlar sanaladi. Chunki gapda tobe qismlari hokim qismga kelishik yordamida bogʻlangan otli va fe'lli soʻz birikmalari mavjud. Notoʻgʻri ma'lumot esa B javobda berilgan, chunki tobe qismi hokim qismga koʻmakchi yordamida bogʻlangan soʻz birikmasi esa mavjud emas.

Toʻgʻri javob: B.

Manba: M.Qodirov va boshqalar. 8-sinf ona tili darsligi. "Tasvir" nashriyot uyi, Toshkent-2019.

- 13. Qaysi javobda toʻldiruvchi vazifasida kelgan qaralmish qatnashgan gap berilgan?
 - A)Soʻzdan qudratliroq narsa yoʻq. U insonlarning dunyoqarashini oʻzgartira oladi.
 - B)Kitoblar keksalikda eng yaxshi doʻst, ayni paytda yoshlikning eng aziz rahnamosidir.
 - C) Til doʻstlik va hamjihatlikni qaror toptirishning eng qulay vositasidir.
 - D)Soʻz inson qudratining qoʻmondoni, u hayotning buyuk quroli.

Ushbu test topshirigʻini bajarish uchun gapda soʻzlarning bogʻlanishi, soʻz birikmalari, tobe va hokim qismlar, qaratqich-qaralmish munosabatlari haqidagi bilim va koʻnikmaga ega boʻlish talab etiladi.

A javobdagi gapda insonlarning duyoqarashini soʻz birikmasida qismlar qaratqich-qaralmish munosabatiga kirishgan boʻlib, qaralmish, ya'ni dunyoqarashini soʻzi toʻldiruvchi vazifasida kelgan.
B va C javobda qatnashgan qaratqich-qaralmish munosabatlarida (yoshlikning rahnamosidir, qaror toptirishning vositasidir) esa qaralmishlar ot kesim vazifasini bajargan.
D javobda qaralmishlar qaratqich aniqlovchi (inson qudratining) va ot kesimlar (qudratining qoʻmondoni, hayotning quroli) vazifasini bajargan.

Toʻgʻri javob: A.

Toshkent-2019.

Manba: N.M.Mahmudov va boshqalar. 7-sinf ona tili darsligi Toshkent "Ma'naviyat"-2017.
M.Qodirov va boshqalar. 8-sinf ona tili darsligi. "Tasvir" nashriyot uyi,

14. Kitob bebaho durga oʻxshaydi, insonlar ma'naviyatini boyitadi.

Ushbu gapdagi tobe bogʻlanishlarda hokim qism vazifasini bajara olmagan boʻlaklarni aniqlang.

A)ega, sifatlovchi aniqlovchi, qaratqich aniqlovchi

- B) sifatlovchi aniqlovchi, qaratqich aniqlovchi vositali toʻldiruvchi
- C) ega, sifatlovchi aniqlovchi, vositasiz toʻldiruvchi
- D)ega, sifatlovchi aniqlovchi, vositali toʻldiruvchi


Ushbu test topshirigʻini bajarish uchun gapda soʻzlarning bogʻlanishi, soʻz birikmalari, tobe va hokim qismlar, gap boʻlaklari haqidagi bilim va koʻnikmaga ega boʻlish talab etiladi.

Kitob bebaho durga oʻxshaydi, u
insonlar ma'naviyatini boyitadi gapida
kitob, bebaho, insonlar(ning) soʻzlari
faqat tobe qism vazifasini bajara olgan,
ya'ni gapdagi boshqa boʻlaklarga nisbatan
hokim qism vazifasini bajara olmagan
boʻlib, ushbu soʻzlar gapda ega, sifatlovchi
aniqlovchi, qaratqich aniqlovchi vazifalarida
kelgan. Gapdagi durga soʻzi vositali
toʻldiruvchi sanaladi va bebaho soʻziga
nisbatan hokim qism hisoblanadi,
ma'naviyatini soʻzi esa vositasiz
toʻldiruvchi boʻlib, insonlar(ning) soʻziga,
ya'ni qaratqich aniqlovchiga nisbatan hokim
qism vazifasini bajarishi kuzatiladi.

Toʻgʻri javob: A.

Manba: M. Qodirov va boshqalar. 8-sinf ona tili darsligi. "Tasvir" nashriyot uyi, Toshkent-2019.

15. Quyidagi chizmaga mos keluvchi ergash gapli qoʻshma gapni aniqlang.



- A)Xonaga kirishim bilan meni koʻrgan oyimning yuzlarida goʻzal tabassum paydo boʻldi, chunki mening qoʻllarimda oyimga xush yoquvchi oppoq atirgullar bor edi.
- B)Biz farzandlarimizni Ona Vatan va buyuk ajdodlarimizga hurmat, ulardan faxrlanish tuygʻusi bilan tarbiyalashimiz uchun ularga tarixni mukammal oʻrgatishimiz lozim.
- C) Ov va jang manzaralari uni shu qadar qiziqtirgan ediki, otasi kelib eshik oldida kavush yechayotganini ham payqamadi.
- D)Naqsh yaratish ustadan did, mahoratdan tashqari katta tajriba va malaka talab qiladi, shuning uchun naqqoshlar xalq hunarmandlarining eng bilimdon, iste'dodli qismi hisoblangan.

Ushbu test topshirigʻi abituriyentning til birliklari haqidagi nazariy qoidalarni bilishi bilan birga, ularning nutqdagi amaliy ahamiyatini tushunishini, gaplarning oʻzaro mazmuniy va grammatik jihatdan bogʻlanishini tahlil qila olishini tekshirishga qaratilgan. Test topshirigʻining shartida qoʻshma gap qismlari ifodalayotgan voqea-hodisalar oʻrtasidagi sabab-oqibat munosabatini tushunish va chizmaga asosan bosh gap + ergash gap tuzilishidagi gapni aniqlash soʻralgan. A javobda keltirilgan gap ushbu talablarga javob beradi: Xonagakirishim bilan meni koʻrgan oyimning yuzlarida qoʻzal tabassum paydo boʻldi - bosh gap, mening qoʻllarimda oyimga xush yoquvchi oppoq atirgullar bor edi – ergash gap. Chunki sabab ergashtiruvchi bogʻlovchisi yordamida bogʻlanganligini inobatga olsak, ushbu gap qismlari sabab-oqibat munosabatini ifodalaganligini kuzatish mumkin.

- **16.** Qaysi javobda "Ravshan" dostoni voqealari bayoni toʻgʻri berilgan?
 - A)Goʻroʻgʻli asrab olgan farzandlarini bir-biriga quda qilish maqsadida Avazxonning qizi Gulanorni Ravshanxonga soʻrab sovchilikka boradi, ammo Avaz oʻzini boshqalardan ustun tutadi, hatto: "Qizim tugul kuchugumdan sadagʻa", deya ochiqdan ochiq haqorat qiladi.
 - B) Avazxon qizini Ravshanxonga berishni xohlamagani uchun Hasanxonning oriyati kelib oʻgʻlini Shirvon elga borishga va Zulxumorni olib kelishga undaydi va u bilan oʻzi ham qoʻshilib boradi.
 - C) Aynoq, Jaynoq, Ersak, Tersak kabi polvonlar Ravshan Shirvon elda oʻgʻil tutingan kampirning oʻz farzandlari boʻlib, Qoraxon podsho ulardan juda qoʻrqar edi.
 - D)Ravshanxonning zindonda yotganini eshitgan Goʻroʻgʻli Gʻirkoʻk otini minib, yoʻlga chiqadi va uch oylik yoʻlni yigirma kunda bosib oʻtib, nevarasini dor ostidan qutqarib oladi.

Xalq ogʻzaki ijodiga mansub ushbu test topshirigʻini bajarish uchun abituriyentlardan oʻquv darsliklarida berilgan xalq dostonlari, ulardagi voqealar bayoni haqida bilim va koʻnikmaga ega boʻlish talab etiladi. "Ravshan" dostoni voqealari bayonining toʻgʻri talqini A javobda berilgan. Boshqa javoblarda esa ushbu dostonga xos voqealar notoʻgʻri talqin qilingan.

Toʻgʻri javob: A.

Manba: Q.Yoʻldoshev va boshqalar. 7-sinf adabiyot darsligi. "Sharq"nashriyot-matbaa aksiyadorlik kompaniyasi. Toshkent-2017.

17. . . . kun tugʻadi, olam yorugʻ boʻladi,
U yorugʻligini hammaga yetkazadi,
oʻz-oʻzicha yoʻqolmaydi.
Mening ham qoidam (odatim) shunday,
oʻzim yoʻqolmayman,
Fe'lim va muomalam barcha xalq uchun
birdekdir.

... Tuqqan kun (chiqqan kun) yaxshi yoki yomon demaydi,

Barchaga birdek nur sochadi, oʻzi kamaymaydi.

Yusuf Xos Hojibning "Qutadgʻu bilig" dostonida qaysi ramziy qahramon oʻz sifatlarini ana shu tarzda, ya'ni kun (quyosh)ning xususiyatlariga qiyoslagan holda ifodalab bergan?

A)adolat ramzi boʻlgan adabiy qahramon

- B)davlat ramzi boʻlgan adabiy qahramon
- C)aql va zakovat ramzi boʻlgan adabiy qahramon
- D)qanoat (ofiyat) ramzi boʻlgan adabiy qahramon

Ushbu test topshirigʻini bajarish uchun abituriyentlardan Yusuf Xos Hojib ijodiga oid "Qutadgʻu bilig" dostoni, undagi ramziy qahramonlarning xususiyatlari haqida ma'lumotga ega boʻlish talab etiladi. Mazkur topshiriqdagi parchada dostondagi adolat ramzi boʻlgan elig, ya'ni hukmdor timsoli Kuntugʻdining xislatlari aks etgan.

Toʻgʻri javob: A.

Manba: Boqijon Toʻxliyev va boshqalar. 11-sinf adabiyot darsligi. "Oʻzbekiston milliy ensiklopediyasi" davlat ilmiy nashriyoti. Toshkent-2018.

- 18. "Yigitlik chogʻi oʻyin-kulgi, rohat qilish davri, qarilik esa mehnat va toat-ibodat davridir. Yoshlikda qilingan hamma gunohlar kechiriladi, keyinchalik mehnat va ibodat qiladigan vaqt ham keladi, oʻshanda qilamiz", deya umrini behuda oʻtkazgan, ammo qarib, oʻlim tushagida qolganda: "Qarigach, shunday kunlar boshimga tushajagini bilsam edim, yigitlik davrimni uvol qilib behudaga oʻtkazmagan boʻlar edim", deya afsuslangan gʻofil kishi haqidagi hikoyat qaysi asarda keltirilgan?
 - A) "Saddi Iskandariy" (Alisher Navoiy)
 - B) "Zarbulmasal" (Muhammadsharif Gulxaniy)
 - C)"Qisasi Rabgʻuziy" (Nosiruddin Rabgʻuziy)
 - D)"Qutadg'u bilig" (Yusuf Xos Hojib)

Ushbu test topshirigʻini bajarish uchun abituriyentlardan Alisher Navoiyning "Xamsa" asaridagi "Saddi Iskandariy" dostoni voqealari haqidagi bilim va koʻnikmaga ega boʻlish talab etiladi.

Toʻgʻri javob: A.

Manba: Boqijon Toʻxliyev va boshqalar. 11-sinf adabiyot darsligi. "Oʻzbekiston milliy ensiklopediyasi" davlat ilmiy nashriyoti. Toshkent-2018.

19. Hajringda, ey pariro', ko'zumdin qochdi uygu,

Har kecha tongga degru, ishimdur oh-u nola. Qaysi shoir oʻzining "Xating aro uzoring — sabza ichinda lola" deb boshlanuvchi gʻazalining ushbu baytida asosiy qofiyadan tashqari uch oʻrinda ichki qofiyadan ham foydalangan holda misralar jarangdorligi, ohangdorligini yanada oshirgan?

- A)Zahiriddin Muhammad Bobur
- B)Zokirjon Xolmuhammad oʻgʻli Furqat
- C) Alisher Navoiy
- D)Boborahim Mashrab

Ushbu test topshirigʻini bajarish uchun abituriyentlardan Zahiriddin Muhammad Bobur hayoti va ijodi haqidagi bilim va koʻnikmaga ega boʻlish talab etiladi.

To'g'ri javob: A.

Manba: Boqijon Toʻxliyev va boshqalar. 11-sinf adabiyot darsligi. "Oʻzbekiston milliy ensiklopediyasi" davlat ilmiy nashriyoti. Toshkent-2018.

- **20.** Abdulla Qodiriyning "Mehrobdan chayon" romani voqealari haqidagi qaysi ma'lumot toʻgʻri emas?
 - A)Qobil doʻstlari Sharif va Rahimlar bilan birgalikda ellik nafar yigit qoʻriqlab turgan oʻrda qoʻrgʻonidan oʻtib, zindonband qilingan Sultonalini qatldan qutqarib qoladi.
 - B)Xon Anvarlarning qochishida uning doʻsti Sultonalini aybdor sanab, garov tariqasida hibsga oladi va agar Anvar taslim boʻlmasa, oʻlimga hukm qilishini aytib jar soldiradi.
 - C) Anvarning mirzaboshi darajasiga erishganini koʻra olmagan mulla Abdurahmon, Shahodat mufti va Kalonshoh mirzo kabi kimsalar Anvar bilan xonning orasini buzish uchun Ra'noning goʻzalligi ta'rifini hukmdorga yetkazadilar.
 - D) Jasorati, xonga qarshi isyoni, hatto ma'yus qolgan Anvarni yoʻlga solishi oʻz zamonasi uchungina emas, bizning hozirgi asrimiz uchun ham tahsinga loyiq boʻlgan Ra'no Qoʻqon bilan vidolashish oldi, tahlikali boʻlsa ham, onasi bilan uchrashish fikriga tushib qoladi.

Ushbu test topshirigʻini bajarish uchun abituriyentlardan Abdulla Qodiriyning "Mehrobdan chayon" romani voqealari haqidagi bilim va koʻnikmaga ega boʻlish talab etiladi.

Toʻgʻri javob: A.

Manba: Q.Yoʻldoshev va boshqalar. 7-sinf adabiyot darsligi. "Sharq"nashriyot-matbaa aksiyadorlik kompaniyasi. Toshkent-2017.

21. "Jaloliddin Manguberdi" tragediyasidagi qaysi adabiy qahramon oʻz otasining qotili boʻlgan Temur Malikdan oʻch olishni poylab yurgan Yaroqbekni:

"Ammo sen-chi? Burgutlar boshligʻiga xanjar ur,

So'ngra xoqon qasrida sultonlarcha davron sur!", — deya avval Jaloliddin Manguberdini o'ldirishga da'vat qiladi?

A)Qodogʻon noʻyon (Chingizning sarkardalaridan)

- B)Chol (devona)
- C)Elbors pahlavon (choʻpon)
- D)Amir Badriddin (Sultonbegimning qayligʻi)

Ushbu test topshirigʻini bajarish uchun abituriyentlardan Maqsud Shayxzodaning "Jaloliddin Manguberdi" tragediyasining voqealar bayoni haqida ma'lumotga ega boʻlish talab etiladi.

Toʻgʻri javob: A.

Manba: Sultonmurod Olim va boshqalar. 8-sinf adabiyot darsligi. Gʻafur Gʻulom nomidagi nashriyot-matbaa uyi. Toshkent-2019.

22. Oʻzbekiston xalq shoirasi Halima Xudoyberdiyeva oʻzining qaysi she'ri yaratilishi haqida yozar ekan, she'rning yozilishiga turmush oʻrtogʻining uylanishiga rozi boʻlgan ayolning ikki uy oraligʻidagi katta masofada butun hovli yuziga mix qoqib chiqqani haqidagi bir rivoyat turtki boʻlganini xotirlab: "Dastlabki turtki shu—"Mixning, tigʻning zahrini sezmay yonib boraman" satri boʻlib, koʻnglimni qizdirdi. Qolgani ijodkorning xayoloti...",—deydi?

A)"Begim, sizni tabiat"

- B) "Dorilomon kunlar keldi..."
- C) "Shunchaki"
- D)"Bir oʻrim soch tarixi"

Ushbu test topshirigʻini bajarish uchun abituriyentlardan Halima Xudoyberdiyeva hayoti va ijodi haqida ma'lumotga ega boʻlish talab etiladi.

Toʻgʻri javob: A.

Manba: Q.Yoʻldoshev va boshqalar. 9-sinf adabiyot darsligi. "Oʻzbekiston" NMIU. Toshkent-2019.

23. Quyidagi jadvalning qaysi qatorlaridagi ma'lumotlar mos ravishda berilgan?

	Badiiy asarlar	Adabiy qahramonlar	Adabiy qahramonlarga berilgan ta'riflar
1.	"Navoiy"	shoir Binoiy	Turkiy tilni nihoyatda sevadigan, uni "forsiyparast"lardan
			qattiq himoya qiladigan, bu tilning jozibadorligini har joyda
			isbot eta oladigan jonkuyar timsol
2.	"Yulduzli	Qosimbek	Boburni ota kabi asragan sadoqatli beklardan biri boʻlib, umri
	tunlar"		davomida uni himoya qilib kelgan, Humoyun mirzoni ham
			jangovarlik va otaga muhabbat ruhida tarbiyalashda katta
			hissa qoʻshgan timsol
3.	"O'tkan	Mirzakarim	Xalq uchun kuyib-pishgan, uning tinchligi, birdamligi uchun
	kunlar"	qutidor	kurashgan, Toshkent hokimi Azizbekning zulmiga qarshi
			xalqni otlantirgan timsol
4.	"Navoiy"	Sultonmurod	Otasi shahrisabzlik sangtarosh usta boʻlib, uning vafotidan
			keyin tarbiyasi onasi qoʻlida qolgan, voyaga yetgach Hirotga
			kelgan, oʻz ilmi, aqli-u tafakkuri bilan mudarris darajasiga
			koʻtarilgan olim shaxs

A) **2**, **4** B) 2, 3 C) 1, 4 D) 1, 2

Ushbu test topshirigʻini bajarish uchun abituriyentlardan mustaqil ravishda toʻliq oʻqish uchun tavsiya etilgan qoʻshimcha badiiy asarlar, ulardagi voqealar bayoni, adabiy qahramonlar haqidagi bilim va koʻnikmalarga ega boʻlish talab etiladi.

Toʻgʻri javob: A.

Manba: Pirimqul Qodirovning "Yulduzli tunlar" romani, Oybekning "Navoiy" romani.

- **24.** Qaysi javobda Oʻtkir Hoshimov qalamiga mansub "Dunyoning ishlari" qissasiga oid ma'lumot keltirilgan?
 - A)Ushbu asarda oʻgʻli Oltmishvoy urushga ketgan, xotini Habiba buvi oʻgʻlining diydorini koʻrmay olamdan oʻtgan, bu ayriliqqa chidolmay esdan ogʻib qolgan Ermon buva haqidagi hikoya mavjud.
 - B) Ushbu asarda oʻzi nabirasiga soʻzlab bergan ertagidagi kabi bugʻu avlodidan ekanligi bilan faxrlanadigan, toʻy va ma'rakalarda xokisorlik bilan xizmat qiladigan, ammo bu fazilatlari qadrlanmaydigan bobo obrazi mavjud.
 - C) Ushbu asarda ota-bobolarining urf-odatlari unutilib ketayotganidan iztirobga tushadigan, kolxoz raisi boʻlgach, onasining vafoti munosabati bilan gazetada yozilgan ta'ziyani or bilgan polvon obrazi uchraydi.
 - D) Ushbu asarda pochchasining avaylab boqayotgan qimmatbaho qushlariga qatiq (suzma) ichirib oʻldirib qoʻygan bolaning holati hajv bilan tasvirlangan.

Ushbu test topshirigʻini bajarish uchun abituriyentlardan mustaqil ravishda toʻliq oʻqish uchun tavsiya etilgan qoʻshimcha badiiy asarlar, ulardagi voqealar bayoni, adabiy qahramonlar haqidagi bilim va koʻnikmalarga ega boʻlish talab etiladi.

Toʻgʻri javob: A.

Manba: O'tkir Hoshimovning "Dunyoning ishlari" romani.

- 25. Qaysi asarda xalqni birlashmoqqa, oʻzaro diniy e'tiqodlar nizosidan xalos boʻlib, qabih mustamlakachilik zulmiga qarshi jang qilmoqqa chorlagan hamda oʻz e'tiqodi yoʻlida yosh jonini ayamagan, tinimsiz tazyiqlar, hibs, qiynoqlarda yashagan shoir qismati aks etgan?
 - A)"Ruhlar isyoni" (Erkin Vohidov)
 - B) "Sohibqiron" (Abdulla Oripov)
 - C) "Mardlik afsonasi" (Shuhrat)
 - D) "Mambet botirning qatl oldidan aytganlari" (Oʻljas Sulaymon)

Ushbu test topshirigʻini bajarish uchun abituriyentlardan mustaqil ravishda toʻliq oʻqish uchun tavsiya etilgan qoʻshimcha badiiy asarlar, ulardagi voqealar bayoni, adabiy qahramonlar haqidagi bilim va koʻnikmalarga ega boʻlish talab etiladi.

Toʻgʻri javob: A.

Manba: Erkin Vohidovning "Ruhlar isyoni" romani.

- 26. Quy, mezbonim, ammo had bilan, Bogʻing aro turfa gullar bor, Oqshom menga niqob ostidan, Ohu koʻzin suzdi gulruxsor. Ohu koʻzli Sharq goʻzaliga oshiqlik tasviri boʻlgan ushbu misralar qaysi shoir qalamiga mansub.
 - A) Sergey Yesenin B) Toʻra Sulaymon C) Muso Jalil D) Oʻljas Sulaymonov Ushbu test topshirigʻini bajarish uchun abituriyentlardan jahon adabiyoti namoyandalari, ularning hayoti va ijodiga oid ma'lumotlarga ega boʻlish talab etiladi. Mazkur test topshirigʻida keltirilgan parcha rus shoiri Sergey Yesenin qalamiga mansub she'rdan olingan.

Toʻgʻri javob: A.

Manba: Q.Yoʻldoshev va boshqalar. 9-sinf adabiyot darsligi. "Oʻzbekiston" NMIU. Toshkent-2019.

Alisher Navoiy qalamiga mansub ushbu she'riy parchani oʻqing va quyidagi savollarga javob bering.

Tarki adabdin biri kulgu durur, Kulgu adab tarkiga belgu durur...

Qahqahadin kabk navo kelturub, Boshiq'a ul kulgu balo kelturub.

Gʻuncha kulib boʻldi ochilmoq anga, Yetti ochilmoqda sochilmoq anga.


- **27.** Alisher Navoiy qalamiga mansub ushbu she'r mazmuni haqidagi **xato** fikrni belgilang.
 - A)Ushbu she'riy parchaning mazmunida kulgi odobli insonning ziynati ekanligi aytilgan.
 - B) Ushbu she'riy parchada shoir o'z fikrining isboti sifatida kabk, ya'ni kaklikning sayragani o'z boshiga balo keltirdi degan majoziy dalil keltirmoqda.
 - C) Ushbu she'riy parchada shoir o'z fikrining isboti sifatida g'uncha kulganligi, ya'ni ochilganligi uchun so'lib qolishga mahkum bo'ldi degan majoziy dalil keltirmoqda.
 - D) Ushbu she'riy parchada kishining boshiga odobsizligi tufayli kulfat tushadi degan mazmun ifodalangan.
- **28.** Alisher Navoiy qalamiga mansub ushbu she'r haqidagi **xato** ma'lumotni belgilang.
 - A) Ushbu she'riy parcha a-a b-b d-d tarzida qofiyalangan.
 - B) Ushbu she'riy parchaning har bir baytida radif qo'llangan.
 - C)Ushbu she'r parchaning barcha baytlarida unli tovush raviy sifatida xizmat qilgan.
 - D) Ushbu she'riy parchada ham mutlaq, ham muqayyad qofiya mavjud.

Ushbu test topshirigʻi adabiyot nazariyasiga oid bilim va koʻnikmalarni tekshirishga qaratilgan boʻlib, toʻgʻri javobni topishda abituriyentdan she'riy matn mazmunini tushunish bilan bir qatorda, raviy, qofiya, radif kabi she'riy unsurlarni ajrata bilishi ham talab qilinadi. She'riy matn asosida ikkita test topshirigʻi berilgan boʻlib, dastlabki test topshirigʻi mazmuniy tahlilga qaratilgan boʻlsa, ikkinchi test topshirigʻi she'rning nazariy tahliliga qaratilgan.

Toʻgʻri javoblar: A, C.

Manba: Q.Yoʻldoshev va boshqalar. 7-sinf adabiyot darsligi. "Sharq" NMAK. Toshkent-2017.

- 1. XXI asrda muvaffaqiyat qozonish uchun qanday koʻnikmalar ustida ishlash kerakligini bilasizmi? Pablo Pikasso "Men doimo uddalash qiyin boʻlgan ishni qilaman. Shundagina men uni qanday bajarish mumkinligini bilib olaman", deb yozgan edi.
- 2. Ishda yuksalish, baxtiyor yashash va muvaffaqiyatga erishishda quyidagi koʻnikma va qobiliyatlarning oʻrni yuqori.



3. Maktab partasidanoq yuqorida sanab oʻtilgan koʻnikmalarning egallashga va oʻrganishga urinish yorqin kelajagingiz garovi boʻlishi mumkin.

(Internet ma'lumotlaridan)

- 29. Internet ma'lumotlari asosida tayyorlangan ushbu matnni oʻqing va raqamlab koʻrsatilgan bandlarida roʻy bergan xatoliklar turi moslashtirib koʻrsatilgan toʻgʻri javobni belgilang.
 a) imloviy xatolik; b) ishoraviy xatolik (punktuatsion); c) uslubiy xatolik (qoʻshimcha qoʻllash bilan
 - a) imloviy xatolik; b) ishoraviy xatolik (punktuatsion); c) uslubiy xatolik (qoʻshimcha qoʻllash bilar bogʻliq xatolik).
 - A)1-b, 2-a, 3-c
 - B) 1-a, 2-c, 3-b
 - C)1-c, 2-b, 3-a
 - D) 1-b, 2-c, 3-a
- **30. Internet ma'lumotlari asosida tayyorlangan** ushbu matnni oʻqing va matnning ikkinchi bandidagi <u>intellekt, menejment, kommunikativlik</u> soʻzlarini almashtirish mumkin boʻlgan muqobili toʻgʻri koʻrsatilgan javobni belgilang.
 - A) intellekt hissiy aql-zakovat; menejment odamlarni boshqarish koʻnikmasi; kommunikativlik odamlar bilan oʻzaro samimiy muloqot
 - B) intellekt odamlar bilan oʻzaro samimiy muloqot; menejment odamlarni boshqarish koʻnikmasi; kommunikativlik hissiy aql-zakovat
 - C)intellekt odamlarni boshqarish koʻnikmasi; menejment odamlar bilan oʻzaro samimiy muloqot; kommunikativlik hissiy aql-zakovat
 - D) intellekt hissiy aql-zakovat; menejment odamlar bilan oʻzaro samimiy muloqot; kommunikativlik odamlarni boshqarish koʻnikmasi

Ushbu test topshirigʻi nutqiy kompetensiyani (oʻqib tushunish) baholashga qaratilgan boʻlib, abituriyentning matn bilan ishlash koʻnikmasini tekshiradi. Matn asosida ikkita test topshirigʻi berilgan boʻlib, dastlabki test topshirigʻi matnning imloviy, uslubiy, punktuatsion xususiyatlari tahliliga qaratilgan boʻlsa, ikkinchi test topshirigʻi bevosita matn mazmunini tushunishni baholashga qaratilgan.

Toʻgʻri javoblar: A, A.

Manba: amaldagi ona tili darsliklari.